

Suliffeqarfimmik kisimiillutik ingerlatsillutik namminersorlutik inuussutissarsiteqartut Meerartaarnermut atatillugu sulinngiffeqarnermut aningaasaateqarfimmit meerartaarnermi sulinngiffeqarnermi ullormusianik pissarsisinnaassagunik, suliffeqarfimminnik unitsitsigallartussaajunnaarsillugit imaluunnit matusisinnaajunnaarsillugit Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaata allanngortinneqarnissaanut siunnersuusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Napaartoq Isak Petrussen, Demokraatit)

Akissuteqaat

(Isumaginninnermut, Suliffeqarnermut, Ilaqutariinnut Nunamullu Namminermut Naalakkersuisoq)

Aappassaaneerinnineq

Naalakkersuisut sinnerlugit Ilaqutariinnermut Peqqissutsimullu Ataatsimiititaliaq siunnersuummik sukumiisumik suliariinnerannut aammalu isumaliutissiissummut tunngavissalimmut qujassuteqarfigaara.

Naalakkersuisut maluginiarpaat ataatsimiititaliap erseqqissaraa inummik ataatsimik inuussutissarsiorluni suliffeqarfiit erninermut, qitornartaarnermut meeravissartaarnermullu atatillugu atugaasa pillugit annertunerusumik ilisimasaqalernissaq pisariaqartoq, kiisalu inatsisitigut, aningaasaqarnikkut allaffissornikkullu allannguutaasinnaasunut kingunerisassat pillugit ilisimasaqarnerunissaq pisariaqartoq.

Taamatuttaaq ataatsimiititaliami amerlanerussuteqartut Naalakkersuisut inassuteqaataata akuerineqarnissaanik inassuteqarnerat Naalakkersuisut maluginiarpaat. Naalakkersuisut erninermut, qitornartaarnermut meeravissartaarnermullu atatillugu ilaqutariit atugaasa pitsaanerulersinneqarnissaat siunertaralugu aaqqiissutaasinnaasunik misissuinermik ineriartortitsinermillu suliaqarnerup ingerlaqqinnissaa qilanaaralugu.

Tamanna tunngavigalugu Naalakkersuisut allannguutissatut siunnersuut akuerineqassasoq inassutigaat.